

四庫全書

史部

欽定四庫全書

史部

文獻通考卷三百三十八

詳校官內閣學士臣瑞保

編修臣程嘉謨覆勘

覆校官中書臣孫希旦

校對官中書臣田尹衡

謄錄監生臣沈方大

欽定四庫全書

文獻通考卷三百三十七

鄱陽馬端臨貴與著

四裔考十四

于闐

于闐漢時通焉都葱嶺之北二百餘里去長安九千七
百里戶三萬二千東北至都護治所三千九百里南與
婁婁接北與姑墨接東北去龜茲千四百里東去鄯善

千五百里西通皮山國四百里去東朱俱波國千里西北至疎勒國千五百里其國之西水皆流注西海其東

水東注鹽澤

即蒲昌海

國有阿耨達山據漢書河源出焉

名首

拔河亦名樹拔河或云即黃河也此海七百里入計戍水一名計首水即葱嶺南河同入鹽澤或云阿耨達即

崑崙山

風俗物產與龜茲畧同後漢建武末莎車王賢強

盛攻并于闐徙其主俞林為驪歸王以莎車將軍居德為于闐王明帝永平中居德死後于闐將休莫霸自立為王休莫霸死兄子廣德立後遂滅莎車其國轉強盛

從精絕西北至疎勒十三國皆服從而鄯善王亦始強
盛自是南道自葱嶺以東唯此二國為大順帝時遣侍
子詣闕貢獻元嘉時漢所遣長史王敬入于闐矯詔殺
其王建為于闐將輸欒等所殺將討之後竟不能出兵
于闐恃此遂驕後魏真君中太武討吐谷渾慕利延慕
利延遂西入于闐殺其王死者甚衆獻文末蠕蠕寇于
闐于闐遣使上表曰西方諸國今皆已屬蠕蠕奴世奉
大國至今無異故遣使奉獻遙望救援自後每使朝獻

梁武帝時凡四遣使通江左獻方物及琉璃鬲刻玉佛
周建德三年遣使獻名馬隋大業中頻遣使朝貢時其
王姓王氏錦帽金裝冠髮不令人見俗云見王髮年必
儉國地方亘千里所都城方八九里部內有大城五小
城數十山多美玉有好馬駝騾其刑法與中國畧同風
俗物業與龜茲同俗重佛法寺塔僧尼甚衆王尤信尚
每設齋日必親自洒掃饋食于闐西五百里有比摩寺
云是老子化胡成佛之所

云老子至此白日昇天與羣
胡辭訣言我暫游天上尋當

下生其後出天竺國化為胡王太子自稱曰佛因立此寺俗無禮義多盜賊淫縱自高昌以西諸國人等深目高鼻唯此一國貌不甚胡頗類華夏其後并有漢戎盧杆彌渠勒皮山精絕五國故地其居曰西山城勝兵四千人有玉河國人夜視月光盛處必得美玉王居繪室俗機巧言迂大喜事祇神浮屠法然貌恭謹相見皆跪以木為筆玉為印凡得問遺書戴於首乃發之自漢武帝以來中國詔書符節其王傳以相授人喜歌舞工紡織西有沙磧鼠大如蝟色類

金出入羣鼠為從初無螫蠶丐鄰國不肯出其王即求婚許之將迎乃告曰國無帛可持蠶自為衣女聞置蠶帽絮中關守不敢驗自是始有蠶女刻石約無殺蠶蛾飛盡得治繭王姓尉遲氏名屋密本臣突厥唐貞觀六年遣使者入獻後三年遣子入侍阿史那社爾之平龜茲也其王伏闕信大懼使子獻橐駝三百其後隨使者入朝請以子弟宿衛上元初身率子弟酋領七十人來朝擊吐蕃有功帝以其地為毗沙都督府析十州授伏

閣雄都督死子璲立開元時獻馬駝豹璲死復立尉遲
伏師戰為王死伏閣達嗣立死子珪嗣珪死子勝嗣至
德初以兵赴難因留宿衛乾元三年以其弟葉護曜權
知本國事以後絕不復至晉天福三年其王李聖天自
稱唐之宗屬遣使來貢高祖遣供奉官張匡鄴高居誨
等入其國冊聖天為大寶于闐國王匡鄴等自靈州行
二年至于闐七年乃還頗記其往來所見山川而不能
道聖天世次也

居誨記曰自靈州過黃河行三十里始涉沙入党項界曰細腰沙神樹沙至三公沙宿月支都督帳自此沙行四百餘里至黑堡沙沙尤廣遂登沙嶺沙嶺党項牙也其酋曰捻崖天子渡曰亭河至涼州涼州西行五百里至甘州甘州回鶻牙也其南山百餘里漢小月支之故地也有別族號鹿角山沙陀云朱邪氏之遺族也自甘州西始涉磧磧無水載水以行甘州人教晉使者作馬蹄木澁四竅馬蹄亦作四竅而綴

之駝蹄則包以釐皮乃可行西北五百里至肅州渡
金河西百里出天門關又西百里出玉門關經吐蕃
男子冠中國帽婦人辮髮戴瑟瑟云珠之好者一珠
易一良馬西至瓜州沙州二州多中國人聞晉使者
來其刺史曹元深等郊迎問使者天子起居瓜州南
十里鳴沙山云冬夏殷殷有聲如雷云禹貢流沙也
又東南十里三危山云三苗之所竄也其西渡都鄉
河曰陽關沙州西曰仲雲族其牙帳居胡盧磧云仲

雲者小月支之遺種也其人勇而好戰瓜沙之人皆
憚之胡盧磧漢明帝時征匈奴屯田於吾盧蓋其地
也地無水而常寒多雪每天暖雪銷乃得水匡鄴等
西行入仲雲界至大屯城仲雲遣宰相四人都督三
十七人候晉使者匡鄴等以詔書慰諭之皆東向拜
自仲雲界西始涉鹽磧無水掘地得濕沙人置之胸
以止渴又復渡陷河伐檉置水中乃渡不然則陷又
西至紺州紺州于闐所置也在沙州西南云去京師

九千五百里矣又行二日至安軍州遂至于闐聖天
衣冠如中國其殿皆東向曰金冊殿有樓曰七鳳樓
以葡萄為酒又有紫酒青酒不知其所釀而味尤美
其食粳沃以蜜粟沃以酪其衣布帛有園圃花木俗
喜鬼神而好佛聖天居處嘗以紫衣僧五十人列侍
其年號同慶二十九年其國東南曰銀州廬州湄州
其南千三百里曰玉州云漢張騫所窮河源出于闐
而山多玉者此山也

漢乾祐元年復遣使入貢宋建隆二年十二月聖天遣使貢圭一以玉為桺使者言國城東有白玉河西有綠玉河次西有烏玉河源出崑崙山去國城西千三百里每歲秋水小之後國人取玉於河謂之撈玉官取之後方許私取以葡萄醞為酒味極醇美乾德三年五月于闐僧善名善法來朝賜紫衣其冬又有朝使至四年貢方物開寶二年遣使來貢且言本國有玉一塊凡二百三十七斤願以上進乞遣使取之四年其國王書來言

破踈勒國得舞象一欲以為獻詔俱許之大中祥符二年其國黑韓王遣回鶻羅廝溫等以方物來貢跪上壽上詢其在路幾時去此幾里對曰涉道一年晝行暮息不知里數昔時道路嘗有剽劫今自瓜沙至于闐道路清謐行旅如流願遣安撫遠俗上曰路遠命使益以勞費爾國今降詔書汝賁往亦與命使無異也天聖三年遣使來貢玉鞍轡白玉帶胡錦獨峯索駝乳香硃砂詔給還其直別賜襲衣金帶銀器嘉祐八年八月遣使貢

方物十一月以其國王為特進歸忠保順砮麟黑韓王
于闐謂金翅鳥為砮麟黑韓蓋可汗之訛使言其王乞
此號云熙寧以來遠不踰一二歲近則歲再至所貢珠
玉珊瑚翡翠象牙乳香木香琥珀花蕊布砮砂龍鹽胡
錦玉鞦轡馬膃臍金星石水銀安息雞舌香有所持
無表章者每賜以暈錦旋襴衣金帶器幣宰相則盤球
雲錦夾襴地產乳香來輒羣負私與商賈牟利不售則
歸諸外府得善價故其來益多元豐初始詔唯賫表及

方物馬驢乃聽詣闕乳香以無用不許貢四年遣蕃部
阿辛上表稱于聞國僂僂有福力知文法黑汗王書與
東方日出處大世界田地主漢家阿舅大官家大畧云
路遠傾心相向前三遣使入貢未回重複數百言董獻
使導至熙州譯其辭以聞詔前三輩使人皆已朝見錫
賚遣發賜勅書諭之神宗嘗問其使去國歲月所經何
國及有無鈔掠對曰去國四年道途居其半歷黃頭回
紇達靺青唐唯懼契丹鈔掠耳因使之圖上諸國距漢

境遠近為書以授李憲八年九月遣使入貢使者為神
宗飯僧追福賜錢百萬還其所貢獅子元祐中以其使
至無時令熙河間歲一聽至闕八年請討夏國不許紹
聖中其王阿忽都董娥密竭篤又言緬藥家作過別無
報效已遣兵攻甘沙肅三州詔厚答其意知秦州游師
雄言于聞大食拂菻等國貢奉般次踵至有司憚於供
賫扣留邊方限二歲一進夷狄慕義萬里而至此非所
以來遠人也從之自是訖於宣和朝貢不絕

疎勒

疎勒漢時通焉王治疎勒城去長安九千三百里戶千五百都白山南百餘里東至都尉所二千二百里南有河西帶葱嶺亦名雪山在國西北百餘里河所出東去龜茲千五百里西去撥汗國

一名判汗

千里當大月氏大宛

康居道南去莎車五六百里北去朱俱波八九百里

隋史云東

北去突厥牙帳千餘里東南去瓜州四千六百里

在于閼國北千五百里土多

稻粟蔗銅鐵綿錦雌黃後漢明帝永平中龜茲王建攻

殺疎勒王成自以龜茲左侯兜題為疎勒王漢遣班超
刼縛兜題而立成之兄子忠為疎勒王忠後叛反超擊
斬之耿恭為戍已校尉屯車師後王金滿城為匈奴所
攻恭引衆入疎勒城中乏水穿井十五丈不得水恭整
衣冠向井拜拔刀刺山飛泉湧出賊遂退安帝元初中
疎勒王安國死舅臣盤立為王漸以強盛戶至二萬一
千順帝永建二年遣使奉獻至靈帝建寧初為季父和
得所殺自立為王其後連相殺害漢不能復禁至後魏

文成末其王遣使送釋迦牟尼佛袈裟一長二丈餘帝
以其審是佛衣當有靈異命焚之置猛火上終日不燃
其王戴金獅子冠每歲嘗供送於突厥其都城方五里
國內有大城十二小城數十人手足皆六指產子非六
指者即不育勝兵有二千人地多沙磧少壤土俗尚詭
詐生子亦束頭取匾其人文身碧瞳王姓裴氏自號阿
摩支居迦師城突厥以女妻之隋大業中又遣使來唐
貞觀九年獻名馬又四年與朱俱波甘棠貢方物儀鳳

時吐蕃破其國開元十六年遣大理正喬夢松等冊其
君安定為疎勒王天寶十二載首領裴國良來朝授折

衝都尉賜紫袍魚袋

杜環經行記云拔汗那國在恒邏
所南千里東隔山去疎勒二千餘

里西去本國千餘里城有數十兵有數萬唐天寶十載
嫁和義公主於此國土有波羅林林下有毬場又有野
鼠遍滿山谷偏宜葡萄醢羅果香棗桃李從此國至西
海盡居土室衣羊皮疊布男女皆着靴婦人不飾鉛粉
以青黛塗眼
而已醢音諧

烏孫

烏孫國大昆彌治赤谷城

烏孫於西域中其形最異今
之西域青眼赤鬚狀類彌猴

者本其種

去長安八千九百里戶十二萬口六十三萬勝兵

十八萬八千八百人相大祿左右大將二人侯三人大

將都尉各一人大監二人大吏一人舍中大吏二人騎

君一人東至都護治所千七百二十里西至康居蕃

內地五千里地莽平多雨寒山多松櫟

莽平謂有草莽而平也櫟木名

其心似松

不田作種樹隨畜逐水草與匈奴同俗國多馬富人

至四五千匹民剛惡貪狠無信多寇盜最為強國故服

屬匈奴後盛大取羈屬不肯往朝會東與匈奴西北與

康居西與大宛南與城郭諸國相接本塞地也大月氏
西破走塞王塞王南越懸度大月氏居其地後烏孫昆
莫擊破大月氏大月氏徙西臣大夏而烏孫昆莫居之
故烏孫民有塞種大月氏種云始張騫言烏孫本與大
月氏共在燉煌間今烏孫雖强大可厚賂招令東居故
地妻以公主與為昆弟以制匈奴乃令騫齎金幣往昆
莫見騫如單于禮謂自比騫大慙謂曰天子致賜王不
拜則還賜謂將賜物還歸漢也昆莫起拜其他如故初昆莫有十

餘子中子大祿強善將將衆萬餘騎別居大祿兄太子

太子有子曰岑陬

子侯反

太子蚤死謂昆莫曰必以岑陬

為太子昆莫哀許之大祿怒乃收其昆弟將衆叛謀攻岑陬昆莫與岑陬萬餘騎令別居昆莫亦自有萬餘騎以自備國分為三大總羈屬昆莫騫既致賜諭旨曰烏孫能東居故地則漢遣公主為夫人結為昆弟共距匈奴不足破也烏孫遠漢未知其大小又近匈奴服屬日久其大臣皆不欲徙昆莫年老國分不能專制乃發使

送騫併獻馬數十匹報謝其使見漢人衆富厚言其國
其國後乃益重漢匈奴聞其與漢通怒欲擊之又漢使
烏孫乃出其南抵大宛月氏相屬不絕烏孫於是恐使
使獻馬願得尚漢公主為昆弟天子問羣臣議許曰必
先納聘然後遣女烏孫以馬千匹聘漢元封中遣江都
王建女細君為公主以妻焉賜乘輿服御物為備官屬
宦官侍御數百人贈送甚盛烏孫昆莫以為右夫人匈奴
奴亦遣女妻昆莫昆莫以為左夫人

其國謂王曰昆
彌亦曰昆莫公

主至其國別治宮室而居歲時一再與昆莫會置酒飲
食昆莫年老言語不通公主悲愁自作歌以述意天子
聞而憐之間歲遣使者贈遺昆莫年老欲使其孫岑陁
尚公主公主不聽上書言狀詔從其俗岑陁遂妻公主
昆莫死岑陁立岑陁者官號也名軍須靡公主死漢復
以楚王戊之孫解憂為公主妻之岑陁死季父子翁歸
靡立號曰肥王復尚解憂公主宣帝初公主及昆彌上
言匈奴連歲侵擊欲發國中精兵自給人馬五萬騎盡

力擊匈奴唯天子出兵以救本始三年漢發十五萬騎
五將軍分道並出遣校尉常惠持節護烏孫兵昆彌將
五萬騎從西方入至匈奴右谷蠡王庭獲四萬級馬牛
羊騾橐駝七十餘萬元康二年昆彌上書願以漢外孫
元貴靡為嗣解憂主得令復尚公主詔下公卿議蕭望之
等以為烏孫絕域變故難保不可許上美烏孫新立大
功難重絕故業許其婚會翁歸靡死國人共立岑陬子
泥靡代為昆彌元貴靡不得立乃不復與婚泥靡既立

號狂王復尚解憂生一男鴟靡王不與主和又暴惡失
衆漢使衛司馬魏和意副候任昌送侍子公主言狂王
為烏孫所患苦易誅也遂謀置酒會罷使士拔劍旁下
狂王傷上馬馳去其子細沈瘦會兵圍和意昌及公主
於赤谷城數月城中困急都護鄭吉發諸國兵救之乃
解去初肥王翁歸靡胡婦子烏就屠狂王傷時驚與諸
翯音翁侯俱去居北山中揚言母家匈奴兵來故衆歸之
後遂襲殺王自為昆彌宣帝詔立肥王之子元貴靡為

大昆彌烏就屠為小昆彌元貴靡後孫雌栗靡立國亂
段會宗立其季父伊秩靡為大昆彌哀帝元壽二年伊
秩靡與匈奴單于

烏珠留名囊知牙
斯呼韓邪之子

並入朝漢以為榮

自烏孫分立兩昆彌後漢用憂勞且無寧歲

言或鎮撫
之或威制

之故
多事

其後無聞至後魏時亦朝貢其國數為蠕蠕所侵

西徙葱嶺

姑墨

姑墨漢時通焉王治南城去長安八千一百里戶三千

五百東至都護治所二千里南至于闐馬行十五日北
界接烏孫出銅鐵雌黃東通龜茲六百里王莽時其王
丞殺溫宿王并其國至後魏時役屬龜茲

溫宿

溫宿漢時通焉王治溫宿城

今京北府醴泉縣北有山名溫宿嶺者本因漢時溫

宿國人令居此因以名山

去長安八千三百餘里戶二千二百東至

都護治所二千三百餘里西至尉頭三百里北至烏孫
赤谷六百餘里土地物類所有與鄯善諸國同通姑墨

東二百餘里至後魏時亦役屬龜茲

烏秣

烏秣

上一加反
下直加反

漢時通焉王治烏秣城去長安萬里戶

五百東北至都護治所四千九百北與子合蒲犂西與

難兜接山居田石間有白草累石為室人接手

自高山
下溪澗

中飲水故接連
其手如猿飲

出小步馬

小細也細步言其能
蹠足所謂百步千足

有驢無

牛西有懸度

山石溪谷不通以
獨索相引而度

去陽關五千九百里去

都護治所五千里其國後魏又通謂之於摩國

難兜

難兜漢時通焉去長安萬一百里戶五千東北至都護治所二千八百里西南至罽賓三百里南至婁羌北與休屠西與大月支接種五穀葡萄果有銀鐵銅作兵與諸國同屬罽賓

大宛

大宛漢時通焉王治貴王山城去長安萬二千五百里戶萬東至都護治所四千里北至康居卑闐城千五百

里西南至大月氏七百里北與康居南與大月氏接土地風氣物類人俗與大月氏安息同大宛左右以葡萄酒為酒富人藏酒至萬餘石久者至數十年不敗人嗜酒

馬嗜苜蓿多善馬汗血言其先天馬子

大宛國中有高山其上有馬不

可得因取五色母馬置其下與集生駒其汗血因號為天馬子

始張騫為武帝言之帝

遣使者持千金及金馬以請宛善馬宛王以漢絕遠大兵不能至遂殺漢使太初元年拜李廣利為貳師將軍期至貳師取善馬率數萬人至其境攻郁城不下引還

往來二歲至燉煌士卒存者十不過一二帝怒其不剋
使遮玉門不許入貳師因留屯燉煌又遣貳師率六萬
人負私從者不與馬牛十萬馬三萬匹驢索駝萬數天
下騷然益發戍甲卒十八萬置居延休屠

今武威張掖郡界以

衛酒泉貳師至宛宛人斬王母寡首獻馬漢軍取其善
馬數十匹中馬以下牝牡三千匹而立宛貴人昧蔡為
王約歲獻馬遂採葡萄苜蓿種而歸貳師再行往返凡
四歲自宛以西至安息雖頗異言然大同自相曉知也

其人皆深目多髭髯善賈其俗貴女子女子所言丈夫
乃決正其地無絲漆不知鑄器及漢使亡卒降教鑄作
兵器後漢明帝時宛又獻汗血馬至後魏文成帝和平
六年孝文太和三年並遣使獻馬隋時蘇對沙那國即
漢大宛也宋膺異物志大宛馬有肉角數寸或有解人語及知音舞與鼓節相應者隋西域圖記云
其馬驢馬烏馬多赤耳黃馬赤馬多黑耳唯耳色別自餘毛色與常馬不異又云王姓蘇色匿字底失槃陀積代承襲不絕按今王即底失槃陀之後也

莎車

莎車國治莎車城去長安九千九百五十里戶二千三百三十九口萬六千三百七十三勝兵三千四十九人輔國侯左右將左右騎君備西夜君各一人都尉二人譯長四人東北至都護治所四千七百四十六里西至疎勒五百六十里西南至蒲犁七百四十里有鐵山出青玉漢宣帝時烏孫公主小子萬年莎車王愛之莎車王無子死死時萬年在漢莎車國人計欲自託於漢又欲得烏孫心即上書請萬年為莎車王漢許之遣使者

奚充國送萬年萬年初立暴惡國人不說莎車王弟呼屠徵殺萬年并殺漢使者自立為王約諸國背漢會衛候馮奉世使送大宛客即以便宜發諸國兵擊殺之更立他昆弟子為莎車王諸國悉平威振西域奉世至大宛大宛聞其斬莎車王敬之異於他使得名馬象龍而還馬形似龍帝甚說下議封奉世少府蕭望之以奉世擅發諸國兵雖有功不可為後法後奉使者爭發兵要功萬里外為國生事於夷狄不可長不宜受封帝善其議拜

奉世光祿大夫匈奴單于因王莽之亂畧有西域唯莎
車王延最強不肯附屬元帝時嘗為侍子長於京師慕
樂中國亦復參其典法常勅諸子當世奉漢家不可負
也天鳳五年延死謚忠武王子康代立光武初康率傍
國拒匈奴擁衛故都護吏士妻子千餘口檄書河西問
中國動靜自陳思慕漢家建武五年河西大將軍竇融
乃承制立康為漢莎車建功懷德王西域大都尉五十
五國皆屬焉九年康死謚宣成王弟賢代立攻破拘彌

西夜國皆殺其王而立其兄康兩子為拘彌西夜王十四年賢與鄯善王安並遣使詣闕貢獻於是西域始通葱嶺以東諸國皆屬賢十七年賢復遣使奉獻請都護天子以問大司空竇融以為賢父子兄弟相約事漢歟誠又至宜加號位以鎮安之帝乃因其使賜賢西域都護印綬及車旗黃金錦繡燉煌太守裴遵上言夷狄不可假以大權又令諸國失望詔書收還都護印綬更賜賢以漢大將軍印綬其使不肯易遵迫奪之賢由是始

恨而猶詐稱大都護移書諸國諸國悉服焉號賢為
單于賢浸以驕橫重求賦稅數攻龜茲諸國恐懼
二十一年冬車師前王鄯善焉耆等十八國俱遣子入
侍獻其珍寶及得見皆流涕稽首願得都護天子以中
國初定北邊未服皆還其侍子厚賞賜之是時賢自負
兵強欲并兼西域攻擊益甚諸國聞都護不出而侍子
皆還大憂恐乃與燉煌太守檄願留侍子以示莎車言
侍子見留都護尋出冀且息其兵裴遵以狀聞天子許

之二十二年賢知都護不至遂遺鄯善王安書令絕通漢道安不納而殺其使賢大怒發兵攻鄯善安迎戰兵敗亡入山中賢殺掠千餘人而去其冬賢復攻殺龜茲王遂兼其國鄯善焉耆諸國侍子久留燉煌愁思皆亡歸鄯善王上書願復遣子入侍更請都護都護不出誠迫於匈奴天子報曰今使者大兵未能得出如諸國力不從心東西南北自在也於是鄯善車師復附匈奴而賢益橫媯塞王自以國遠遂殺賢使者賢擊滅之立其

國貴人駟韃為媯塞王賢又自立其子則羅為龜茲王
賢以則羅年少乃分龜茲為烏壘國徙駟韃為烏壘王
又更以貴人為媯塞王數歲龜茲國人共殺其王則羅
駟韃而遣使匈奴更請立王匈奴立龜茲貴人身毒為
龜茲王龜茲由是屬匈奴矣賢以大宛貢稅減少自將
諸國兵數萬人攻大宛大宛王延留迎降賢因將其還
國徙拘彌王橋塞提為大宛王而康居數攻之橋塞提
在國歲餘亡歸賢復以為拘彌王而遣延留還大宛使

貢獻如常賢又徙于聞王俞林為驪歸王立其弟位侍
為于聞王歲餘賢疑諸國欲叛召位侍及拘彌姑墨子
合王盡殺之不復置王但遣將鎮守其國莎車將在于
聞者暴虐為其國人所殺賢乃引兵攻于聞兵敗而走
于聞大人休莫霸進圍莎車中流矢死兵乃退于聞立
休莫霸兄子廣德為王匈奴與龜茲諸國共攻莎車不
能下賢連被兵革乃與廣德和後廣德虜賢妻子而并
其國匈奴遣兵將賢質子不居微立為莎車王廣德又

攻殺之更立其弟齊黎為王章帝元和三年長史班超發諸國兵擊莎車大破之由是遂降漢矣

班固論曰孝武之世圖制匈奴患其兼從西國結黨南羌乃表河西列四郡開玉門通西域以斷匈奴右臂隔絕南羌月支單于失援自是遠遁而幕南無王庭因文景元默養人五代天下殷富財力有餘士馬強盛故能睹犀象璆瑁則建珠崖七郡感蒟醬竹杖則開牂牁越雋聞天馬葡萄則通大宛安息自是之

後萬里相奉師旅之費不可勝計至於用度不足乃
權酒酤筦鹽鐵鑄白金造皮幣算至車船租及六畜
人力屈財貨竭因之以凶年羣盜並起是以末年遂
棄輪臺之地且下哀痛之詔豈非仁聖之所悔哉且
通西域近有龍堆遠則葱嶺身熱頭痛懸度之阨淮
南杜欽揚雄之論皆以為此天地所以界別區域絕
外內也書云西戎即序禹就而序之非上威服致其
貢物也西域諸國各有君長兵衆分弱無所統一雖

屬匈奴不相親附匈奴能得其馬畜旃罽而不能統
率與之進退與漢隔絕道路又遠得之不為益棄之
不為損盛德在我無取於彼自建武以來西域思漢
盛德咸樂內屬唯其小邑鄯善車師界迫匈奴尚為
所拘而其大國莎車于闐之屬數遣使請都護置質
聖上遠覽古今因時之宜羈縻不絕辭而未許雖大
禹之序西戎周公之讓白雉太宗之却走馬義兼之
矣亦何以尚茲

罽賓

罽賓國治循鮮城去長安萬二千二百里不屬都護戶口勝兵多大國也東北至都護治所六千八百四十里東至烏秣國二千二百五十里東北至難兜國九日行西北與大月氏西南與烏弋山離接昔匈奴破大月氏大月氏西君大夏而塞王南君罽賓塞種分散往往為數國自疎勒以西北休循捐毒之屬皆故塞種也罽賓地平溫和有首蓐雜草奇木檀櫟

即槐之類
葉大而異

梓竹漆種

五穀葡萄諸果糞治園田地下濕生稻冬食生菜其民

巧雕文刻鏤治宮室織罽刺文繡好治食有金銀銅鐵

以為器市列市有列肆亦如中國也以金銀為錢文為騎馬幕為

人面錢文面作騎馬形幕而作人面幕音漫謂平而無文也出犂牛水牛象大狗

沐猴孔爵犂牛項上隆起者也罽賓大狗大如驢赤色數里搖鞭以呼之沐猴即獼猴也珠璣

珊瑚琥珀璧琉璃孟康曰琉璃青色如玉師古曰魏畧云大秦國出赤白黑黃青綠縹紺紅

紫十種琉璃此蓋自然之物采澤光潤異於衆玉其色不恒今俗所用皆銷治石汁加以衆藥灌而為之尤虛

脆不真實非其物也他畜與諸國同自漢武帝始通罽賓自以絕

遠漢兵不能至其王烏頭勞數剽漢使烏頭勞死子代
立遣使奉獻漢使關都尉文忠送其使王復欲害忠忠
覺之乃與容屈王子陰末赴共合謀攻罽賓殺其王立
陰末赴為罽賓王授印綬後軍候趙德使罽賓與陰末
赴相失相失意也陰末赴鎖琅當德琅當長鎖也若今之禁繫人鎖殺副以
下七十餘人遣使者上書謝孝元帝以絕域不錄放其
使者於懸度絕而不通成帝時復遣使獻謝罪漢欲遣
使者報送其使杜欽說大將王鳳曰前罽賓王陰末赴

本漢所立後卒畔逆夫德莫大於有國罪莫大於執殺
使者所以不報恩不懼誅者自知絕遠兵不至也有求
則卑辭無欲則驕慢終不可懷服凡中國所為通厚蠻
夷愜快其欲者為壤比而為寇今懸度之阨非屬賓所
能越也其向慕不足以定西域雖不附不能危城郭城郭
總謂西域諸國前親逆節惡暴西域故絕而不通今悔過來而
無親屬貴人奉獻者皆行賈賤人欲通貨市買以獻為
名故煩使者送至懸度恐失實見欺凡遣使送客者欲

為防護寇害也起皮山南更不屬漢之國四五斤候士
百餘人五分夜擊刁斗自守

夜有五更故分而持之也

尚時為所侵

盜驢畜負糧須諸國廩食得以自贍國或貧小不能食
或桀黠不肯給擁強漢之節餒山谷之間乞丐無所得
離一二旬則人畜棄捐曠野而不反又歷大頭痛小頭
痛之山赤土身熱之阪令人身熱無色頭痛嘔吐驢畜
盡然又有三池盤石阪道隘者尺六七寸長者徑三十
里臨崢嶸不測之深行者騎步相持繩索相引二千餘

里乃到懸度畜墜未平阬谷盡靡碎人墮勢不得相收
視險阻危害不可勝言聖王分九州制五服務盛內不
求外今遣使者承至尊之命送蠻夷之賈勞吏士之衆
涉危難之路罷敝所恃以事無用非久長之計也使
者業已受節可至皮山而還

言已立計遣之不能
即止可至皮山也

於是鳳

白從欽言屬賓實利賞賜賈市其後數年而一至云自

後無聞至後魏始通之都善見城隋時謂之漕國在葱

嶺之西南

隋史曰即
漢屬賓國

其王姓昭武康國之宗族勝兵萬

餘人國法嚴整殺人及賊盜皆死其俗淫祀葱嶺山有
順天神者儀制極華金銀為屋以銀為地祠前一魚脊
骨其孔中通馬騎出入國王戴金牛頭冠坐金馬座土
多稻粟豆麥有硃砂青黛安息青木等香石蜜黑鹽阿
魏沒藥白附子北去帆延七百里東去剗國六百里南
去瓜州六千六百里大業中遣使貢物唐武德二年遣
使貢寶帶金鎖水精酸玻璃狀若酸棗貞觀中獻名馬
遣使厚齎賜其國并撫慰天竺處羅拔王再拜受命遣

使導至天竺十六年又入貢國人共傳王始祖曰馨孽
至曷禰支傳十二世顯慶三年以其地為修鮮都督府
神龍初拜其王修鮮等十一州諸軍事修鮮都督開元
七年遣使獻天文及秘文奇藥其王請以子拂林闍婆
嗣聽之天寶四載冊其子勃匐準襲王乾元初使者入
貢

吐呼羅

吐呼羅去代一萬二千里東至范陽國西至悉萬斤國

中間相去二千里南至連山不知名北至波斯國中間相去一萬里薄提城周匝六十里城南有大水西流名漢樓河土宜五穀有好馬駝騾其王曾遣使入貢

拔豆

拔豆國去代五萬一千里東至多勿當國西至旃那國中間相去七百五十里南至屬陵伽國北至伏那伏且國中中間相去九百里國中出金銀雜寶白象水牛犛牛葡萄五穀

謝颺

帆延

石汗那

謝颺居吐火羅西南本曰漕矩吒唐顯慶時謂訶達羅
支武后改今號東距罽賓東北帆延皆四百里南婆羅
門西波斯北護時健其王居鶴悉那城七千里多鬱金
瞿草薰泉灌田國中有突厥罽賓吐火羅種人雜居罽
賓取其子弟持兵以禦大食景雲初遣使朝貢後遂臣
罽賓開元八年天子冊葛達羅支頡利發誓屈爾為王
至天寶中數來朝獻帆延者或曰望衍曰梵衍那居斯

卑莫運山之旁西北與護時健接東南距屬賓西南訶
達羅支與吐火羅連境地寒人穴居王治羅爛城有大
城四五水北流入烏許河貞觀初遣使者入朝顯慶三
年以羅爛城為寫鳳都督府縛時城為悉萬州授王蔔
寫鳳州都督管内五州諸軍事自是朝貢不絕也石汗
那或曰斡汗那自縛野底南入雪山行四百里得帆延
東臨烏許河多赤豹開元天寶中一再朝獻

識匿

似沒

役槃

俱蜜

護蜜附

識匿或曰屍棄尼曰瑟匿東南直京師九千里東五百里距葱嶺守捉所南三百里屬護蜜西北五百里抵俱蜜初治苦汗城後散居山谷有大谷五酋長自為治謂之五識匿地二千里無五穀人喜攻剽劫商賈播蜜川四谷稍不用王號令俗窟室唐貞觀二十年與似沒役槃二國使者偕來朝開元十二年授王布遮波資金吾衛大將軍天寶六載王跌失伽延從討勃律戰死擢其子都督左武衛將軍給祿居蕃似沒者北接石土俗與

康同役槃亦與康鄰出良馬俱蜜者治山中在吐火羅
東北南臨黑河其王突厥延陀種貞觀十六年遣使者
入朝開元中獻胡旋舞女其王那羅延頗言為大食暴
賦天子但慰遣而已天寶時王伊悉爛俟斤又獻馬護
蜜者或曰達摩悉鐵帝曰鑊侶元魏所謂鉢和者亦吐
火羅故地東南直京師九千里而羸橫千六百里王居
塞迦蜜城北臨烏澹河地寒沍堆阜曲折沙石流漫有
豆麥宜木果出善馬人碧瞳顯慶時以其地為烏飛州

王沙鉢羅頡利發為刺史地當四鎮入吐火羅道故役屬吐蕃開元八年冊其王羅旅伊陀骨咄祿多毗勒莫賀達摩薩爾為王十六年與米首領米忽汗同獻方物明年大酋烏鶻達于復朝王死冊其從弟護真檀嗣王二十六年身入朝宴內殿拜左金吾衛將軍賜紫袍金帶天寶初請絕吐蕃賜鐵券八載真檀來朝請宿衛詔授右武衛將軍久乃遣又遣首領朝貢乾元元年王紇設伊俱鼻施來朝賜氏李

烏弋山離

烏弋山離漢時通焉去長安萬二千二百里不屬都護

戶口多大國也東北至都護治所六十日行東與罽賓

北與撲桃西與犂靬條支

犂靬即大秦也犂與驪同靬巨連反

行可百餘

日乃到條支

魏時其國名排持

條支

條支漢時通焉去陽關二萬二千一百里在葱嶺之西

城在山之上周回四十餘里臨西海水曲環其南及東

北三面路絕唯西北隅通陸道土地暑濕田宜稻出犂

牛孔雀有大鳥卵如甕人衆甚多往往有小君長安息

役屬之以為外國

安息以條支為外國如言蕃國

善眩其草木畜產五

穀果菜食飲宮室布列錢貨兵器金珠之屬皆與罽賓

同而有桃拔獅子犀牛

桃拔一名符拔似鹿長毛一角者或為天鹿兩角者或為辟邪

獅子似大蟲正黃有頰形尾端茸毛大如斗爾雅亦謂之狡狴拔音步葛反形亦頰旁毛也頰音而占反形音

而其錢獨文為人幕為騎馬絕遠漢使希至自玉門陽

關出南道厯鄯善而南行烏弋山南道極矣轉北而東

馬行六十餘日至安息後漢和帝永元中班超遣掾甘英使大秦抵條支臨大海欲渡而安息西界船人謂英曰海水廣大往來者逢善風三月乃得渡若遇惡風雨亦有三歲者故入海人皆貴三歲糧海中善使人思土戀慕數有死亡者英乃止安息長老傳聞條支有弱水西王母亦未嘗見也

元中記云崑崙之弱水鴻毛不能起也爾雅云觚竹北戶西王母日

下謂之四荒也

自條支乘水西行百餘日近日所入云

安息

安息漢時通焉王治蕃兜城

蕃音盤

去長安萬一千六百

里在葱嶺之西大宛之西可數千里不屬都護北與康居東與烏弋山離西與條支接土地風氣物類人俗與烏弋罽賓同亦以銀為錢文獨為王面幕為夫人面王

死輒更鑄錢有大馬大爵

大爵頸長鷹身蹄似索駝色蒼舉頭高八九尺張翅丈餘

食大麥

地方數千里最大諸國地臨媯水

今謂烏許河

商賈車

船行旁國書革旁行為書記

今西方胡書皆橫行不直下革謂皮不柔者

武

帝始遣使至安息其王令騎迎於東界木鹿城號為小

安息去王都數千里行北過數十城人戶相屬因發使隨漢使以大鳥卵及犂靬眩人獻至後漢章帝時治和犢城遣使獻獅子符拔符拔形似麟而無角自安息西行三千四百里至阿蠻國從阿蠻西行三千六百里至罽賓國從罽賓南行渡河又西至于羅國九百六十里安息西界極矣自此南乘海乃通大秦其土多海西珍奇異物至後周武帝天和二年其王治蔚搜城遣使貢獻至隋大業五年安息國遣使朝貢王姓昭武與康國

王同族都在那蜜水南城有五重環流水宮殿皆為平
頭王坐金駝座高七尺風俗同於康國唯妻其姊妹及
母子遞相禽獸此為異也

文獻通考卷三百三十七

欽定四庫全書

文獻通考卷三百三十八

鄱陽馬端臨貴與著

四裔考十五

大夏

大夏漢時通焉在大宛西南二千餘里媯水南其俗土
著有城屋與大宛同俗去漢萬二千里居漢西南本無
大君長城邑往往置小君長其兵弱畏戰善賈市及大

月氏西徙乃攻之皆臣畜共稟漢使者

同受節度

大夏人多

可萬餘有市販賈諸物其東南界接身毒國皆屬大月

氏

大月氏

大月氏漢時通焉治藍氏城在大宛西可二千里居
媯水北其南則大夏西接安息四十九日行北則康居
去長安萬一千六百里不屬都護戶十萬東去長史所
居六千五百里土地氣候物類風俗錢貨與安息同出

封駝

春上高起

其國本行國也隨畜移徙與匈奴同俗控弦

十餘萬故恃強輕匈奴本居燉煌祁連間

祁連在今張掖郡之西北

至冒頓單于攻月氏而老上單于殺月氏王以其頭為

飲器乃遠去過大宛西擊大夏而臣之都犂水北為王

庭其餘小衆不能去者保南山羗號小月氏於大夏分

其國為五部

匈奴音翁

侯武帝聞月氏遁而怨匈奴無與

共擊之方從事滅胡乃使張騫使月氏時月氏既君大

夏地肥饒少寇志安樂又自以遠漢殊無報胡之心騫

從月氏至大夏竟不能得月氏要領而還後百餘歲貴
霜翎侯兵就却攻滅四翎侯自立為王因號貴霜王又
滅僕達罽賓悉有其國復滅天竺月氏自此之後最為
富盛至後魏代北與蠕蠕接數為所侵遂西徙都薄羅
城去弗敵沙二千一百里

弗敵沙在
藍氏城東

後其王寄多羅勇

武遂興師越大山南侵北天竺自乾陀羅以北五國盡
役屬之國人乘四輪車或四牛六牛八牛輓之在車大
小而已太武時其國人商販到京師自云能鑄石為五

色琉璃於是採礦山中於京師鑄之既成光澤美於西方來者乃詔為行殿容百餘人光色映徹觀者驚以為神明所作自此琉璃遂賤人不復珍之

元中記瑪瑙出大月氏又有牛

名為日及今日取其肉明日創愈宋膺異物志云月氏國有羊尾重者十斤割之供養尋生如故

小月氏

小月氏治富樓沙城其王本大月氏王寄多羅子也寄多羅為蠕蠕所逐西徙後令其子守此城因號小月氏焉在波路西南

後魏史云去漢萬六千六百里

先居西平張掖之間

並今

郡被服頗與羌同其俗以金銀錢為貨隨畜牧移徙亦
類北狄其城東十里有佛塔周三百五十步高八十丈
自佛塔初建計至武定八年八百四十二年所謂百丈
浮圖也晉天福時有仲雲旋居胡盧磧即其遺種

詳見
于闐

考
下

康居

安者東安附

康居漢時通焉在大宛西北可二千里與粟弋伊隣接
王治樂越匿地卑闐城亦居蘇薤城去長安萬二千三

百里不屬都護戶十二萬東至都護治所五千五百里與大月氏同俗地和暖饒桐柳葡萄多牛羊出好馬東

羈事匈奴宣帝時郅支單于殺漢使者西阻康居

依其險阻

以自保固

其後甘延壽陳湯誅滅郅支單于至成帝時康居

遣子侍漢貢獻然自以絕遠獨驕慢都護郭舜數上言

康居驕黠今遣子入侍此其欲賈市為好辭之詐也宜

歸其侍子絕勿復使

不通使於其國

燉煌酒泉二郡及南道八

國給使者往來人馬騾橐駝食皆苦乏空罷耗所過送

迎驕黠絕遠之國非至計也漢為其新通重致遠人

此以

聲名為重終羈縻而未絕自後無聞或名號變易或遷徙吞

併非所詳也晉武帝泰始中其王那鼻遣使獻善馬後

魏太武太延中遣使朝貢其國又稱者舌

後魏史云即漢康居國

隋時謂之康國大業中遣使朝其王姓溫月氏人也

隋史

云即漢康居之後自漢以來相承不絕

舊居祁連山昭武城自被匈奴所

破西踰葱嶺遂有此國枝庶各分王故康國左右諸國

米國史國曹國何國安國小安國那色波國烏那昌國

穆國凡九國皆其種類並以昭武為姓示不忘本也康
國都於薩寶水上阿祿迪城王索髮冠七寶金花衣綾
羅錦繡白疊其妻有髻幪以帛巾丈夫剪髮錦袍名為
強國西域諸國多歸之人皆深目高鼻多鬚髯善商賈
諸夷交易多輾其國有大小鼓琵琶五弦箜篌笛婚姻
喪制與突厥同俗奉佛為胡書氣候溫宜五穀勤修園
蔬樹木滋茂出馬駝騾犂牛黃金硃砂甘松香阿薩那
香枇杷麝皮氍毹錦疊多葡萄酒富家或至千石連年

不敗韋節西蕃記云康國人並善賈男年五歲則令與書少解則遣學賈以得利多為善其人好音聲以六月一日為歲首至此日王及人庶並服新衣剪髮鬚在國城東林下七日馬射至欲罷日置一金錢於帖上射中者則得一日為王俗事天神崇敬甚重云神兒七月死失骸骨事神之人每至其月俱著黑疊衣徒跣撫膺號哭涕淚交流丈夫婦女三五百人散在草野求天兒骸骨七日便止國城外別有二百餘戶專知喪事別築一

院院內養狗每有人死即往取屍置此院內令狗食之
肉盡收骸骨埋殯無棺槨其國大城三十小堡三百尚
浮屠法祠妖神出機巧技十一月鼓舞乞寒以水交潑
為樂唐武德十年遣使來獻貞觀五年又獻獅子獸金

桃銀桃

杜環經行記康國在米國西南三百餘里土沃人富

高宗永徽時以其地

為康居都督府即授其王為都督開元初貢鎖子鎧水
精杯碼碯瓶駝鳥卵其子與大食亟戰不勝來乞師天
子不許久之封其子吐昌為曹王默啜為米王安者一

曰布豁又曰捕喝元魏謂忸密者東北至東安西南至畢皆百里所西瀕烏澣河治阿濫密城即康居小君長罽王故地大城四十小堡千餘募勇健者為柘羯柘羯猶中國言戰士也武德時遣使入朝貞觀初獻方物太宗厚慰其使曰西突厥已降商旅可行矣諸胡大說其王訶陵迦又獻名馬自言一姓相承二十二世云是歲東安國亦入獻言丁姓相承十世云東安或曰小國曰喝汗在那密水之陽東距河二百里許西南至大安四

百里治喝汗城亦曰籛斤大城二十小堡百顯慶時以
阿濫為安息州即以其王昭武殺為刺史籛斤為木鹿
州以其王昭武閉息為刺史開元十四年其王遣使朝
納馬豹後八年獻波斯驪二拂菻繡纓毬一鬱金香石
蜜等其妻可敦獻柘辟大纓毬二繡纓一丐賜袍帶鎧
仗及可敦桂襦裝澤

鏖汗

鏖汗國居葱嶺之西五百餘里古渠搜國也元魏時謂

拔汗那或曰破落那有大城六小城百人多壽王姓昭武字阿利染都城方四里勝兵數千人王坐金羊床妻戴金花俗多朱砂金鐵東去疎勒千里西至蘇對沙那國五百里西北去石國五百里東北去突厥可汗牙二千餘里東去瓜州五千五百里其王自魏晉相承不絕隋大業中遣使貢方物唐貞觀初王契苾為西突厥所殺子遏波之治渴塞城顯慶初遏波之遣使朝貢高宗厚慰諭三年以渴塞城為休循州都督就授刺史自是

歲朝貢元宗開元二十七年其王以功拜奉化王天寶
三載改其國號寧遠帝以外家姓賜其王曰竇又封宗
室女為公主降之十三年王忠節遣子薛裕朝請留宿
衛習華禮聽之授左武衛將軍其事唐最謹

米國

米國都那密水西舊康居之地無王其城主姓昭武康
國王之支庶字閉拙都城方二里勝兵數百人西北去
蘇對沙那國五百里西南去史國二百里東去瓜州六

千四百里隋大業中頻貢方物

烏那遏國

烏那遏國都烏訥水西舊安息之地王姓昭武亦康國
王種類字佛食都城方二里勝兵數百人東北至安國
四百里西北至穆國二百餘里東去瓜州七千五百里
隋大業中遣使貢方物

穆國

穆國都烏訥河之西亦安息之故地與烏那遏為隣王

姓昭武氏亦康居王種類字阿濫密都城方三里勝兵
二千人東北去安國五百里東去烏那遏二百餘里西
去波斯國四千餘里東去瓜州七百里隋大業中遣使
貢方物

曹國

東曹西曹中曹附

曹國隋時聞焉都那密水南數里舊是康居之地國無
主康居王令子烏建領之勝兵千餘人國中有得悉神
自西海以東諸國並敬事之其神有金人破羅闢丈五

尺高下相稱每月以駝五頭馬十匹羊百口祭之常有數千人食之不盡東南去康國百里西去何國百五十里東去瓜州六千六百里大業中遣使入貢東曹或曰都率沙那蘇對沙那劫布咀那蘇都識匿凡四名居波悉山之陰漢貳師城地也東北距俱戰提二百里北至石西至康東至寧遠皆四百里許南至吐火羅五百里有野叉城城有巨窟嚴以關鑰歲再祭人向窟立中即煙出先觸者死武德中與康同遣使入朝其使曰本國以

臣為健兒聞秦王神武欲隸麾下高祖大悅西曹者隋時曹也南接使及波覽治瑟底痕城東北越于底城有得悉神祠國人事之有金貝器欸其左曰漢時天子所賜武德中入朝天寶元年王哥邏僕羅遣使者獻方物詔封懷德王即上言祖考以來奉天可汗願同唐人受調發佐天子征討十一載東曹王設忽阿與安王請擊黑衣大食元宗慰諭之不聽中曹者居西曹東康之北王治迦底真城其人長大工戰鬪

何國

何國都那密水南數里亦舊康居地王姓昭武康居之族類國城樓北壁畫華夏天子西壁畫拂菻

力甚反

諸國

東壁則畫突厥婆羅門諸國王勝兵千人風俗與康國同東去曹國百五十里西去小安國三百里東去瓜州六千七百五十里隋大業中遣使入貢唐貞觀十五年遣使入朝永徽時上言聞唐出師西討願輸糧於軍俄以其地為貴霜州授其王刺史

史國

史國都獨莫水南十里亦舊康居之地其王姓昭武亦
康國王之後枝庶勝兵千餘人俗同康國北去康國二
百三十里南去吐火羅五百里西去那色波國二百里
東北去米國二百里去瓜州六千里隋大業中遣使貢
方物後漸強盛乃創建乞史城為數十里郭邑二萬家
有鐵門山左右峭巉石色如鐵為關以限二國以金固
闔城有神祠每祭必千羊唐貞觀十六年復入貢顯慶

時以其地為陸沙州授其君刺史開元十五年來獻舞女其後首領時時入朝天寶中詔改史為來威國

奄蔡

奄蔡漢時通焉西與大秦接東南二千里與康居接去陽關八千餘里控弦十餘萬與康居同俗而屬康居土氣溫和臨大澤無涯岸多楨松白草及貂畜牧逐水草蓋近北海至後漢改名阿蘭那國後魏時曰粟特一曰溫那沙

後魏史云初匈奴殺其王而有其國至文成帝初遣使朝貢其王忽倪已三世矣

其國

商人先多詣涼土販易及魏克姑臧悉見虜文成初粟特王遣人贖之自後無使貢獻周保定四年來貢方物

滑國

匡阿跋檀周古柯胡密丹附

滑國車師之別種也後漢順帝永建初八滑從班勇擊北虜有功漢以八滑為後部親漢侯自魏晉以來不通中國至梁武帝普通初其王厭帶夷栗陀始遣使獻貢黃獅子白貂裘波斯錦等物後魏之居桑乾也滑猶小國屬蠕蠕後稍强大征其旁國波斯渴槃罽賓龜茲疎

勒姑墨子闐等國焉其獸有獅子兩脚駝野驢有角人
皆善騎射著小袖長袍用金玉為帶女人披裘頭上刻
木為角長六寸以金銀飾之兄弟共妻無城廛屋為居
東向開戶其王坐金牀隨太歲轉無文字以木為契與
旁國通使國中為胡書羊皮為紙無職官事天神火神
每日則出戶祀神而後食跪一拜而止死以木為槨父
母死其子截一耳葬訖即吉其言語待譯而後通至後
魏時謂之滑匿阿跋檀周古柯胡密丹等國並滑旁小

國也衣服容貌皆同普通初使使隨滑入貢

白題

白題王姓支名史稽毅其先蓋匈奴之別種胡漢灌嬰與匈奴戰斬白題騎一人是也在滑國東去滑六日行西極波斯土地出粟麥瓜果食物略與滑同梁普通三年遣使貢方物

噉達

噉達國大月氏之種類也亦曰高車之別種其原出於

塞北自金山至後魏文成帝時已七八十年矣在于聞之西去長安一萬一百里其王都拔底延城蓋王舍城也其城方十餘里多寺塔皆飾以金風俗與突厥略同其俗兄弟共一妻夫無兄弟者妻戴一角帽若有兄弟者依其多少之數更加帽角焉衣服類加以纓絡頭剪髮其語與蠕蠕高車及諸胡不同衆可有十萬無城邑依隨水草以羶為屋夏遷涼土冬逐暖處其諸妻皆在別所相去或一二百里三百里其王巡歷而行每月一

處冬寒之時三月不徙王位不必傳子子弟堪者死便受之其國無車有輿多駝馬用刑嚴急賊盜無多少皆腰斬一責十死者富家累石為藏貧者掘地而埋隨身諸物皆置塚內其人凶悍能鬪戰西域康居于闐沙勒安息及諸小國三十許皆役屬之號為大國與蠕蠕婚姻自後魏太安之後每遣使朝貢正光末貢獅子一至高平遇万俟醜奴反因留之醜奴平送京師永熙以後朝獻遂絕初熙平中明帝遣賸仗子統宋雲沙門法力

等使西域訪求佛經時有沙門慧生者亦與俱行正光
中還慧生所經諸國不能知其本末及山川里數蓋舉
其略云至大統十二年遣使貢方物廢帝二年周明帝
二年並遣使來獻為突厥所破部落分散職貢遂絕隋
大業中又遣使朝貢方物其國去曹國千五百里東至
瓜州六千五百里

鉢和

鉢和在渴槃陀西其土尤寒人畜同居穴地而處又有

大雪山望若銀峰其人唯食餅麪飲麥酒服擅裘有二
道一道西行向噉噉一道西南趨烏菴亦為噉噉所統

波知

波知國在鉢和西南土狹人貧依託山谷其王不能總
攝有三池傳云大池有龍王次者有龍婦小者有龍子
行人經之設祭乃得過不祭多遇風雪之困

賒彌

賒彌國在波知之南山居不信佛法專事諸神亦附噉

遼東有鉢盧勒國路險緣鐵鎖而度下不見底後魏熙平中遣使宋雲等竟不能達

烏菴

烏菴國在賒彌南北有葱嶺南至天竺婆羅門胡為其上族婆羅門多解天文吉凶之數其主動則訪決焉土多林果引水灌田豐稻麥事佛多諸寺塔極華麗人有爭訟服之以藥曲者發狂直者無恙為法不殺犯死罪唯徙於靈山西南有檀特山山上立寺以驢數頭運食

山下無人控御自知往來也

乾陀

乾陀國在烏菴西本名業波為噉達所破因改焉其王本是敕勒臨國已二世矣好征戰與罽賓鬪三年不罷人怨苦之有鬪象七百頭十人乘一象皆執兵仗象鼻縛刀以戰所都城東南七里有佛塔高七十丈周三百步即所謂雀離佛圖也

挹怛同

挹怛國都烏許水南二百里大月氏之種也勝兵五六萬俗善戰先時國亂突厥遣通設宋語強領其國俗同吐火羅南去曹國千五百里東去瓜州六千五百里隋大業中遣使來貢按劉璠梁典滑國姓噉達後裔以姓為國號轉訛又謂之挹怛焉其本原或云是車師之種或云高車之種又韋節西蕃記云親問其國人並自稱挹聞又按漢書陳湯征郅支康居副王挹聞抄其後則此或康居之種類然傳自遠國夷語訛舛年代綿邈莫知根實不可得而辨也今考其風俗物產及諸家所說而編之

天竺

天竺後漢通焉即漢時身毒國

初張騫使大夏見邛竹杖蜀布問曰安得此大

夏人曰吾賈人往身毒國市之即天竺也或云摩伽陀或云婆羅門在蔥嶺之南去月氏東南數千里地方三萬餘里其中分為五天竺一曰中天竺二曰東天竺三曰南天竺四曰西天竺五曰北天竺地各數千里城邑數百南天竺際大海北天竺距雪山四周有山為壁南面一谷通為國門東天竺東際大海與扶南林邑鄰接但隔小海而已西天竺與罽賓波斯相接中天竺據四百里去都護治所二千八百里南與蔥嶺相連北與烏孫接衣服類烏孫隨水草故塞種也顏師古云捐毒即身毒身毒則天竺塞種即釋種也蓋語音有輕重也

從月氏高附國以西南至西

海東至盤起皆身毒之地有別城數百城置長有別國

數十國置王雖各小異而俱名身毒

扶南傳云舍衛國隸屬天竺伽尸國

一名波羅柰國一名皮波羅柰斯國竺法維佛國記云波羅柰國在伽維羅越國南千四百八十里釋法盛歷國傳云其國有稍割牛其牛黑色角細長可四尺餘十日一割否則病或致死人服牛血皆老壽國人皆壽五百歲牛壽亦等於人亦天竺屬國都臨恒河一名伽毗黎河靈鷲山胡

語曰耆闍崛山山有青石頭似鷲鳥

竺法維佛國記云在摩竭提國南亦

天竺屬國也

其時皆屬月氏月氏殺其王而置將令統其人

俗修浮圖道不殺生飲酒遂以成俗地卑濕暑熱其國臨大水乘象而戰其人弱於月氏漢武帝遣使十餘輩

出西南指求身毒為昆明所閉莫能通和帝時數遣使
貢獻後西域反畔乃絕桓帝延熹二年頻從日南徼外
來獻世傳明帝夢見金人長大頂有光明以問羣臣或
曰西方有神名曰佛其形長丈六尺而黃金色帝於是
遣使天竺問佛道法遂於中國圖畫形像焉楚王英始
信其術中國因此頗有奉者後桓帝好神數祀浮
圖老子百姓稍有奉者後遂盛魏晉世絕不復通唯吳
時扶南王范旃遣親人蘇勿使其國從扶南發投拘利

口循海大灣中正西北入歷灣邊數國可一年餘到天竺江口逆水行七千里乃至焉天竺王驚曰海濱極遠猶有此人乎即令觀視國內仍差陳宋等二人以月支馬四疋報旃勿積四年方至其時吳遣中郎康泰使扶南及見陳宋等具問天竺土俗云佛道所興國也人敦龐土饒沃其王號茂論所都城郭水泉分流繞於渠澗下注大江其宮殿皆雕文鏤刻街曲市里屋舍樓觀鐘鼓音樂服飾香華水陸通流百賈交會器玩珍瑋恣心

所欲左右嘉維舍衛葉波等十六大國去天竺或二三千
里共尊奉之以為在天地之中宋文帝元嘉五年天
竺伽毗黎國王月愛遣使奉表獻金剛指環摩勒金環
寶物赤白鸚鵡各一明帝泰始二年又遣使貢獻以其

使為建威將軍

元嘉十八年蘇摩黎國王遣使獻方物
孝武孝建二年斤陀利國王遣長史獻

金銀寶器後廢帝元徽元年婆黎
國遣使貢獻此數國皆事佛道

梁天監初天竺王屈

多遣長史竺羅達奉表獻瑠璃唾壺雜香吉貝等物國
臨大江新陶源出崑崙分為五江總名恒水其水甘美

下有真鹽色正白如水精後魏宣武時南天竺遣使來

獻駿馬云其國出獅子貂豹獐

胡毘反

橐駝犀象有火齊

如雲母而紫色裂之則薄如蟬翼積之則如紗縠之重

沓有金剛似紫石英百鍊不銷可以切玉璫瑁金銅鐵

鉛錫金縷織成金罽白疊氍毹

氍毹音塔登

有旃檀鬱金等

香甘蔗諸果石蜜胡椒薑黑鹽西與大秦安息交市海

中或至扶南交趾貿易多珊瑚珠璣琅玕俗無簿籍以

齒貝為貨尤工幻化大夫致敬極者舐足摩踵而致其

詞家有音樂倡伎其王與大臣多服錦罽王為螺髻於
頂餘髮剪之使短丈夫剪髮穿耳垂瑠俗皆徒跣衣重
白色怯於鬪戰有弓箭甲殖亦有飛梯地道木牛流馬
之法有文字善天文算歷之術其人皆學悉曇章書於
貝多樹葉以記事國中處處指曰佛故跡也信盟誓傳
禁呪能致龍起雨隋煬帝志通西域遣裴矩應接西蕃
諸國多有至者唯天竺不通帝以為恨天竺王姓乞利
咤氏亦曰刹利世有其國不篡殺穢歲四熟禾之長者

沒索駝婦人項飾金銀珠纓絡死者燔骨取灰建宰堵
或委野中及河餌鳥獸魚鼈無喪紀謀反者幽殺之小
罪贖錢不孝者斷手足劓耳徙邊唐武德中國大亂王
尸羅逸多勒兵戰無前象不弛鞍士不釋甲因討四天
竺皆北面臣之會唐浮屠元奘至其國尸羅逸多名見
曰而國有聖人出作秦王破陣樂試為我言其為人元
奘粗言太宗神武平禍亂四夷賓服狀王喜曰我當東
面朝之貞觀十五年自稱摩伽陀王遣使者上書帝命

雲騎尉梁懷璫持節慰撫尸羅逸多驚問國人自古亦有摩訶震旦使者至吾國乎皆曰無有戎言中國為摩訶震旦乃出迎膜拜受詔書戴之頂復遣使者隨入朝詔尉衛丞李義表報之大臣郊迎傾都邑縱觀道上焚香尸羅逸多率羣臣東面受詔書復獻火珠鬱金菩提樹二十二年遣右衛率府長史王元策使其國以蔣施仁為副未至尸羅逸多死國人亂其臣那伏帝阿羅那順自立發兵拒元策時從騎纔數十戰不勝皆沒遂剽

諸國貢物元策挺身奔吐蕃西鄙檄名鄰國兵吐蕃以
兵千人來泥婆羅以七千騎來元策部分進戰荼鏝和
羅城三日破之斬首三千級溺水死萬人阿羅那順委
國走合散兵復陣施仁擒之俘斬千計餘衆奉王妻息
阻乾陀衛江施仁擊之大潰獲其妃王子虜男女萬二
千人雜畜二萬降城邑五百八十所東天竺國王尸鳩
摩送牛馬三萬餽軍及弓刀寶纓絡迦沒路國獻異物
并上地圖諸老子像元策執阿羅那順獻闕下有司告

宗廟擢元策朝散大夫得方士那邏邇婆娑寐自言壽
二百歲有不死術帝改館使治丹命兵部尚書崔敦禮
護視使者馳天下採怪藥異石又使者走婆羅門諸國
所謂畔荼法水者出石臼中有石象人守之水有七種
色或熱或冷能銷草木金鐵人手入輒爛以索駝髑髏
轉注瓠中有樹名咀賴羅葉如黎生窮山崖腹前有巨
虺守穴不可到欲取其葉者以方鍬矢射枝則落為羣
鳥啣去則又射乃得之其詭譎類如此後術不驗聽還

不能去死長安高宗時盧伽逸多者東天竺烏荼人亦以術進拜懷化大將軍乾封三年五天竺皆來朝開元時中天竺遣使者三至南天竺一獻五色能言鳥乞師討大食吐蕃丐名其軍元宗詔賜懷德軍使者曰蕃夷惟以袍帶為寵帝以錦袍金革帶魚袋并七事賜之北天竺一來朝乾元末河隴陷沒遂不復至周廣順三年西天竺僧薩滿多等十六族來貢名馬宋乾德三年滄州僧道圓自西域還得佛舍利一水晶器貝葉梵經四

十夾來獻道圓天福中詣西域在塗十二年住五印度
凡六年五印度即天竺也還經于闐與其使偕至太祖
召問所歷風俗山川道里一一能記四年僧行勤等一
百五十七人詣闕上言願至西域求佛書許之以其所
歷甘沙伊肅等州焉耆龜茲于闐割祿等國又歷布路
沙加濕彌羅等國並詔諭令人引導之開寶後天竺僧
持梵夾來獻者不絕八年冬東印度王子穰結詵囉來
朝貢天竺之法國王死太子襲位餘子皆出家為僧不

復居本國有曼殊室利者乃其王子隨中國僧至焉太祖令館於相國寺善持律為都人之所傾嚮財施盈溢衆頗嫉之以其不解唐言即偽為奏求還本國許之詔既下曼殊室利始大驚恨衆僧諭以詔旨不得已遲留數月而後去自言詣南海附賈人船而歸終不知所適太平興國七年益州僧光遠至天竺以其王沒徙曩表來上上令天竺僧施護譯云近聞支那國內有大明王至聖至明威力自在每慙薄幸朝謁無由遙望支那起

居聖躬萬福光遠來蒙賜金剛吉祥無畏坐釋迦聖像
袈裟一事已披掛供養伏願支那皇帝福慧圓滿壽命
延長常為引導一切有情生死海中渡諸沉溺今以釋
迦舍利附光遠上進又譯其國僧統表詞意亦與沒徒
曩同施護者烏填曩國屬北印度西行十二日至乾陁
羅國又西行二十日至曩誡羅賀羅國又西行十日至
嵐婆國又西行十二日至誡惹曩國又西行至波斯國
得西海自北印度行百二十日至中印度中印度西行

三程至呵囉尾國又西行十二日至迦囉拏俱惹國又西行十二日至摩羅尾國又西行二十日至烏然泥國又西行二十五日至羅囉國又西行四十日至蘇羅茶國又西行十一日至西海凡中印度行六月程至南印度又西行九十日至供迦拏國又西行一日至海自南印度南行六月程得南海皆施護之所述云八年僧法遇自天竺取經回至三佛齊遇天竺僧彌摩羅失黎語不多令附表願至中國譚經上優詔召之法遇復募緣

製龍寶蓋袈裟將復往天竺表乞給所經番國敕書遂
賜三佛齊國王遐至葛古羅國主司馬佶芒柯蘭國主
讚怛羅西天王子謨馱仙書以遣之雍熙中衛州僧辭
澣自西域還與胡僧密怛羅奉北印度王及金剛坐王
那爛陀書來又有婆羅門僧永世與波斯外道阿里煙
同至京師永世自言本國名利得國王姓牙羅五得名
阿喏你縛衣黃衣戴金冠以七寶為飾出乘象或肩輿
以音樂螺鈸前導多遊佛寺博施貧乏其妃曰摩訶你

衣紬鏤金紅衣歲一出多所賑施人有冤抑俟王及妃出遊即迎隨申訴署國相有四人庶務並委裁制五穀六畜果實與中國無異市易用銅錢有文漫圓徑如中國之制但實其中心不穿貫耳其國東行經六月至大食國又二月至西州又三月至夏州阿里煙自云本國王號黑衣姓張名哩里没用錦綵為衣每遊獵三二日一還國署大臣九人治國事無錢貨以雜物貨易其國東行經六月至婆羅門至道二年八月有天竺僧隨舶

至海岸持帝鐘鈴杵銅鈴各一佛像一軀貝葉梵書一
夾與之語不能曉天聖三年九年西印度僧愛賢智信
護等來獻梵書經各賜紫方袍束帶五年二月僧法吉
祥等五人以梵書來獻賜紫方袍景祐三年正月僧善
稱等九人貢梵經佛骨及銅牙菩薩像賜以束帛

石湖范氏吳船錄曰乾德二年詔沙門三百人入天
竺求舍利及貝多葉書有繼業三藏姓王氏耀州人
預遣中至開寶九年始歸寺所藏涅槃經一函四十

二卷業於每卷後分記西域行程雖不甚詳然地里

大畧可考世所罕見錄於此以備國史之闕業自階

州出塞西行由靈武西涼甘肅瓜沙等入伊吳

元用此吳

字

高昌焉耆于闐疎勒大食諸國度雪嶺至布路州

國又度大蔥嶺雪山至伽濕彌羅國西登大山有薩

陞太子投崖飼虎處遂至健他羅國謂之中印土又

西至庶流波國及左攔陀羅國國有二寺又西過四

大國至大曲女城南臨淄牟河北背洹河塔廟甚多

而無僧尼又西二程有寶階故基又西至波羅柰國
兩城相距五里南臨洹河又西北十許里至鹿野苑
塔廟佛跡最夥業自云別有傳記今不傳矣南行十
里渡洹河河南有大浮屠自鹿野苑西至摩羯提國
館於漢寺寺多租入八村隸焉僧徒往來如歸南與
杖林山相直巍峯歸然山北有優波掬多石室及塔
廟故基西南百里孤山名雞足三峯云是迦葉入定
處又西北百里有菩提寶座城四門相望金剛座其

中東向又東至尼連禪州東岸有石柱記佛舊事自
菩提座東南五里至佛苦行處又西三里至三迦葉
村及牧牛女池金剛座之北門外有獅子國伽藍又
北五里至伽耶城又北十里至伽耶山云是佛說寶
雲經處又自金剛座東北十五里至正覺山又東北
三十里至骨磨城業館於蝦羅寺謂之南印土諸國
僧多居之又東北四十里至王舍城東南五里有降
醉象塔又東北登大山細路盤紆有舍利子塔又臨

澗有下馬迎風塔度絕壑登山頂大塔廟云是七佛
說法處山北平地又有舍利本生塔其北山半曰鷲
峯云是佛說法華經處山下即王舍城城北山趾有
溫泉二十餘井又北有大寺及伽蘭陁竹園故跡又
東有阿難半身舍利塔溫湯之西有平地直南登山
腹有畢鉢羅窟業止其中誦經百日而去窟西復有
阿難證果塔此去新王舍城八里日往乞食會新王
舍城中有蘭若隸漢寺又有樹提迦故宅城其西有

輪王塔又北十五里有那爛陀寺寺之南北各數十
寺門皆西向其北有四佛座又東北十五里至烏巔
頭寺東南五里有聖觀自在像又東北十里至伽濕
彌羅寺寺南距漢寺八里許自漢寺東行十二里至
却提希山又東七里有鴿寺西北五十里有支那
西寺古漢寺也西北百里至花氏城育王故都也自
此渡河北至毗耶離城有維摩方丈故跡又至拘尸
那城及多羅聚落踰大山數重至泥波羅國又至磨

逾里過雪嶺至三耶寺由故道自此入階州

摩揭它

那揭烏荼大食章求拔悉立附

摩揭它一曰摩伽陀本中天竺屬國環五十里土沃宜稼穡有異稻巨粒號供大人米王居拘闍揭羅城或曰俱蘇摩補羅曰波吒釐子城北瀕殤伽河唐貞觀二十一年始遣使者自通於天子獻波羅樹樹類白楊太宗遣使取熬糖法即詔揚州上諸蔗柞瀋如其劑色味愈西域遠甚高宗又遣王元策至其國摩訶菩提祠立碑

焉後德宗自製鐘銘賜那蘭陀祠又有那揭者亦屬國也貞觀二十年遣使者貢方物烏茶者一曰烏菴直天竺南地廣五十里東距勃律六百里西屬賓四百里山谷相屬產金鐵葡萄鬱金稻歲熟人柔詐善禁架術國無刑殺抵死者放之窮山罪有疑飲以藥視洩清濁而決輕重有五城王居術曹藥利城一曰曹揭釐城東北有達麗羅川即烏菴舊地貞觀十六年其王達摩因陀訶斯遣使者獻龍腦香璽書優答大食與烏菴東鄙接

開元中數誘之其王與骨咄俱位二王不肯臣元宗命使者冊為王章求拔國或曰章揭拔本西羌種居悉立西南四山中後徙山西與東天竺接衣服畧相類因附之地袤八九百里勝兵二千人無城郭好鈔暴商旅患之貞觀二十年其王羅利多菩伽因悉立國遣使入朝元策之討中天竺發兵來赴有功由是職貢不絕悉立當吐蕃西南戶五萬城邑多傍澗溪男子繒束頭衣氍裼婦人辮髮短裙婚姻不以財聘其穀宜秔稻麥豆死

者葬於野不封樹喪制為黑衣滿年而除刑有刑剗常
羈屬吐蕃

車離

車離後漢時通焉居沙奇城一名禮維持一名沛隸王
在天竺東南三千餘里大國也其土氣物類與天竺同
別城數十皆稱王其人怯弱地東西南北方數千里人
皆長八尺乘象駱駝往來鄰國有寇乘象以戰

獅子國

獅子國東晉時通焉天竺旁國也在西海之中延袤二千餘里多出奇寶其地和適無夏冬之異五種隨人所種不須時節其國舊無人止有鬼神有龍居之諸國商賈市易不見其形但珍寶明其所堪價商人依價取之諸國人聞其土樂因此競至或有停住者遂成大國能馴養神獅子遂以為名風俗與婆羅門同而尤敬佛法安帝義熙初遣使獻玉佛像高四尺二寸玉色潔潤形制殊特殆非人工歷晉宋代在建康瓦官寺

先有徵士戴安道手

制佛像五軀及顧長康畫維摩詰并玉像時人謂三絕至齊東昏遂毀玉像前截臂次取身為嬖妾潘貴妃作釵釧時咸嘆惜之

宋文帝元嘉五年其王剽利摩訶南遣使貢

獻梁武帝大通元年後王迦葉伽羅訶黎耶亦遣使貢

獻杜環記獅子國亦曰新檀又曰婆羅門即南天竺也獻國之北人盡胡貌秋夏炎旱國之南人盡獠面四時

霖雨從此始有佛法寺舍人皆僮耳布裹腰唐總章三年遣使來貢天寶初

尸羅述伽再遣使獻大珠鈿金寶纓象齒白氎

高附

高附後漢時通焉在大月氏西南亦大國也其俗似天

竺而弱善賈販內富於財所屬無常天竺屬賓安息三

國強即得之弱則失之

後漢史云先未嘗屬月氏前漢書以為五銅侯數誤矣後屬安

息及月氏破安息始得高附



文獻通考卷三百三十八